

Compromisu: Refundación del Nacionalismu Asturianu

CARLOS X. BLANCO :: 05/06/2012

Tenemos énte nós un procesu abierto, seriú y constructivu, que yo m'atrevo a denominar la "Refundación del Nacionalismu Asturianu". Yo naguaba cuantayá porque tala Refundación surdiera dalgún día. Tocáramos fondu, cayéramos baxu, fundiéramonos toos en griesques absurdes y estériles, cada vuelta más alloñaes de la realidá social astur, cada día más estrompétiques a güeyos d'un observador esternu que, ente curiosu y divertíu, asistiera al frayamientu masoquista d'un movimientu identitariu como yera'l nacionalismu asturianu, movimientu qu'un día, alló polos años 70 del pasaú sieglu, xorreciera al rodiu del yá míticu "Conceyu Bable" como superación de vieyos y febles rexonalismos.

Muchos denunciábamos el frayamientu d'esti movimientu, el remanamientu interesosu del mesmu (per aciu de grandes partíos sucursalistes), el progresivu esfarrape de les señes d'identidá del nacionalista dientro de los micropartíos teóricamente venceyaos a él, el llabor incoherente y destructivu de dellos personaxes y sigles... Too esto tien que ser yá historia, agua pasao que nun mueve molín. Agora tenemos dalgo más qu'una fusión de sigles (que yá defendieramos dellos hasta perder les coraes)... agora tenemos delantre dalgo más qu'eso: un arrogante espaciu abierto a independientes y simpatizantes -ente los que me cuento- que comparten los mínimos apurriós por "Compromisu". Tenemos una ufierta cola fin d'empobinar a un mesmu órganu les nuestres suxerencies y proxeutos y asina, abierta y democráticamente, iguar otra vuelta un movimientu nacionalista que, en siendo plural, nunca escaeza l'oxetu cimeru de la nuesa llucha: la nación asturiana como entidá soberana dende antiguo, con llingua y cultura propies y con una necesidá urxente de ser un país vidable nel marcu d'una Europa de los Pueblos.

¿Qué saldrá d'esta Refundación? Nun lo sé, pero nun veo otru camín pal futuru d'un nacionalismu que, en siendo pequenu, ye posible y necesariu nel País. Posible por cuenta de que siempre se dieron condiciones oxetives pal desendolcu del mesmu n'Asturies. Faltaron les suxetives. Necesariu porque Asturies ta dando les boquiaes yá non como Nación, sinón como sociedá. Agora tenemos un espaciu pa construir en serio, ensin fataes, dende la pluralidá, reservando'l drechu a la discrepancia, pero emburriando toos nel mesmu sen: facer d'Asturies una nación xusta, socialmente equilibrada, con arguyu pola so identidá y con futuru.

Toi con Compromisu.

La Haine